

**Aalajangiiffigisassatut siunnersuummut uunga ilanngussaq 1 naapertorlugu
piaarnerpaamik, kingusinnerpaamillu ulloq 1. oktober 2019-mi atuutilersussamik,
Meeqqanut ulloq unnuarlu paaqqinniffinnik pilersitsineq ingerlatsinerlu pillugit
Namminersorlutik Oqartussat nalunaarutaannut nr. 1, 25. januaari 2019-imeersuut
allannguissamik Naalakkersuisut peqquneqarnissaat pillugu Inatsisartunut
aalajangiiffigisassatut siunnersuut**

(Inatsisartunut ilaasortaq, Aqqaluaq B. Egede-mit, Inuit Ataqtigiit, saqqummiunneqartoq)

Ilaqtariinnermut Peqqissutsimullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap suliarinninnermini makku ilaasortarai:

Inatsisartunut ilaasortaq Laura Táunâjik, Siumut, siulittaasoq
Inatsisartunut ilaasortaq Stine Egede, Inuit Ataqtigiit, siulittaasup tullia
Inatsisartunut ilaasortaq Karl-Kristian Kruse, Siumut
Inatsisartunut ilaasortaq Nivi Olsen, Demokraatit
Inatsisartunut ilaasortaq Malene Vahl Rasmussen, Demokraatit
Inatsisartunut ilaasortaq Mikivsuk Thomassen, Inuit Ataqtigiit
Inatsisartunut ilaasortaq Aqqa Samuelsen, Inuit Ataqtigiit

UPA 2019-imi ulloq 2. april 2019-imi siullermeerinninnerup kingorna ataatsimiititaliap siunnersuut sukumiisumik misissorpaa.

1. Siunnersuutip imarisaa siunertaalu

Meeqqanut ulloq unnuarlu paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarutaat nr. 1, 25. januar 2019-meersumi aalajangersakkat arlallit aalajangersimasut allanngortinneqarnissaannik siunnersuut siunertaqarpoq.

2. Siunnersuutip Inatsisartunit siullermeerneqarnera

Akissuteqaammi saqqummiunneqartut tunngavigalugit siunnersuutip akuerineqarnissaa Naalakkersuisut innersuussutigisinnaanngilaat. Siunnersuutip siullermeerneqarnerani IA-mit ersarissumik taparserneqarpoq, isumaliutissiissutilli ilusiligaaneranut patsisaasut sukumiinerusumik misissorneqarnissaat kissaatigalugu. Meeqqat inuusuttullu

inissinneqarsimasut sapinngisamik pitsaanerpaamik angerlarsimaffippalaartumik atugassaqartinneqarnissaat aallaavigalugu siunnersuutip suliarineqarnerata ingerlateqqinneqarnissaa Siumup innersuussutigaa. Ilaqutariinnermut Peqqissutsimullu Ataatsimiititaliap Nalunaarummut tunngatillugu sukumiinerusumik misissuisoqarnissaa allannguummullu kingullernut tunngavilersuutitut tunngatillugu oqaloqateqarnissaq Demokraatinit ammaffigineqarpoq. Ataatsimiititaliami suliarineqassasoq Partii Naleqqamit, Nunatta Qitornaanit aamma Suleqatigiissitsisunit kissaatigineqarpoq, taamaaliornikkut pissutsit nalunaarummilu kingullertigut allannguutigineqartut attuumassuteqartut tusaaneqarnissaannut periarfissiisoqarsinnaaqqullugu.

3. Sassartitsinerit

Isumassortit (angerlarsimaffiit namminersortut peqatigiiffiat) ilaasortaanik aallartitaanillu ulloq 19. marts 2019-imi ataatsimiititaliaq ataatsimeeqateqarpoq. Meeqqanut ulloq unnuarlu paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarutaat nr. 1, 25. januar 2019-meersumi pissutsit arlallit sooq isornartoqartinneqarnersut Isumassortit ataatsimiititaliamut nassuiaatiginissaat Isumassortinit kissaatigineqarpoq.

23. april-imi Isumassortit allakkatigut nassuiaataat isumaliutissiisummut matumanga **ilanngussaq 1**-itut ilanngunneqarpoq. Ilanngussaq 1 tassaavoq siunnersuummut tunngatillugu Isumassortit ataatsimiititaliamut saaffiginnissutigineqartartut ilaat.

4. Ataatsimiititaliap siunnersuummik suliarinninnera

Meeqqanut ulloq unnuarlu paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarutaat nr. 1, 25. januar 2019-meersaq, meeqqanut ikiorsiisarneq pillugu Inatsisartut inatsisaat nr. 20, 26. juni 2017-meersumi § 32, imm. 4, § 34, imm. 2 aamma 3 aamma § 57, imm. 4 aamma 6 naapertorlugit suliarineqarsimasoq aallarniutigalugu ataatsimiititaliamit maluginiarneqarpoq. Nalunaarut ulloq 1. februar 2019-imi atuutilersoq, ilutigisaanillu meeqqanut paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarutaat nr. 19, 24. november 2017-imeersaq atorunnaarsinneqarsimasoq ilanngullugu ataatsimiititaliamit maluginiarneqarpoq.

Nalunaarummi allannguutitut kingullernut suna tunngavilersuutaanersoq pillugu nassuiaaffigineqarnissaq siunertaralugu Peqqissutsimut, Isumaginninnermut Inatsisinillu Atuutsitsinerlutik Naalakkersuisoq ulloq 27. april 2019-imi ataatsimiititaliamit ataatsimeeqatigineqarpoq. Ilanngullugu tusarniaanerp ingelrasimanagera aammalu tusarniaanermi akissuteqaatit isorinnittut pillugit sukumiisumik nassuiaasoqarnissaa ilanngullugu ataatsimiititaliamit kissaatigineqarpoq.

27. april 2019-imi aallarniutigalugu ataatsimiinnissamut Peqqinnissamut, Isumaginninnermut Inatsisinillu Atuutsitsinerlutik Naalakkersuisup nassuiaataa isumaliutissiisummut matumunnga **ilanngussaq 2**-tut ilanngunneqarpoq.

Meeqqanut ulloq unnuarlu paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarutaat nr. 1, 25. januar 2019-meersaq atuutilersinneqarneranut tunngatillugu suliat siusinnerusukkut ingerlanneqarsimasut tusarniaanermillu ingerlatsinermi illuatungeriit attuumassuteqartut peqataatinneqarsimasut, taamatuttaaq ingerlanneqarnera piumasariaasutut naapertorlugit peqqissaarullugu ingerlanneqarsimasoq ataatsimiititaliaq isumaqartoq.

Maleruagassanut atuuttunut tunngatillugu soqutigisaqaqatigiit assigiinngiaarnerisa tusarniaanerup ingerlanneqarnerani qulaartussaavoq. Tamanna Meeqqanut ulloq unnuarlu paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarutaat nr. 1, 25. januar 2019-meersumut tusarniaanermut sanilliullugu ingerlanneqarsimasumut. Nalunaarummi maleruagassaq taaneqartoq mianersorluni ingerlanneqarneranut takussutissaasoq ataatsimiititaliamit maluginarneqarpoq.

Ulloq unnuarlu paaqqinniffiit pitsaassusaasa nalilersuutitut uuttuutit arfineq pingasunut qulequtakkaarneqarsimaneri ataatsimiititaliamit tusaatissatut tiguneqarput, pisariitsutullu isumaqarfigalugit.

Meeqqanut ulloq unnuarlu paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarutaat nr. 1, 25. januar 2019-meersumut siunnersuuteqartup allannguutissatut siunnersuutaata qanoq imaqarnera ataatsimiititaliamit ilisimaneqarpoq.

Siunnersuummut sammineqartumut tunngatillugu pissutsit sukumiinerusumik ataatsimiititaliamit ataatsimut misissorneqarput, illuatungeriinnillu assigiinngitsunik akerlianik isumaqartunik oqaloqateqarsimalluni.

5. Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinneqarnissaanut aningaasatigut allaffissornikkullu kingunerisassai siunnersuummut tunngavilersuutinut allanneqassasut.

Sunnersuummi immikkoortumi ***Pisortanut aningaasatigut allaffissornikkullu kingunerisassat*** ima allassimasoqarmat ataatsimiititaliamit tusaatissatut tiguneqarpoq:
Inatsimmik piareersaaneq qaammatini pingasuni AC-mit suliarineqarsinnaaassaaq, nutserinerit tusarniaanerillu ingerlanneri ilanngullugit katillugit 200.000 kr. missaani naatsorsuutigineqartariaqarluni.

Inatsisissatut siunnersuut pineqannginnera eqqaassanngikkaanni, nalunaarummi allannguutissatut kissaatigineqartut piareersaatitut suliarinerini sinaakkusiussat iluini 200.000 kr.-t missaani akeqarsinnaasoq siunnersuuteqartup oqaatigivaa.

Namminersortunut innuttaasunullu allaffissornikkut aningaasatigullu kingunerisassanut tunngatillugu siunnersuuteqartoq allappoq:

Namminersortunut aningaasaatigut allaffissornikkullu kingunerisassai:

Ulloq unnuarlu paaqqutarinnittarfinni akissarsianut aningaasartuutit qaffannissaat naatsorsuutigisariaqarpoq, tamanna akissarsiat qaffanneranik tunngaveqarpoq, tassami Naalakkersuisut suliniaqatigiiffiillu isumaqatigiissutaat akissarsianik aalajangiinissaannik maleqqusineq uani peeriniarneqarpoq, taamatut qaffaaneq sulisunik pigiinnarneqarnissamik aningaasartuutitut isigisariaqarput. Tamassumali kingunerisaanik sulisussarsiornermi sulisoqaannarniarnermilu ajornartorsiutaasut qaangerneqassapput meeqqanut inissinneqartunut iluaqutaallutik nuannaarutaallutillu.

Innuttaasunut aningaasatigut allaffissornikkullu kingunerisassai:

Ulloq unnuarlu paaqqutarinnittarfiit sulisullu kattuffii attorneqartut sulinermi atugassarititaasut pillugit isumaqatigiissusiortariaqassapput meeqqat inissinneqartut atugarisaannik tunngaviusumik isumaginnittunik, Inatsisartut Ombudsmandianiimmi nalunaarusiat ersersippaat meeqqanik inissiisarnerni ajornartorsiutaasut anginerit ilagigaat sulisunik pissarsisinnaaneq sulisunillu tigummiinnarsinnaanissaq. Akissarsiatigut qaffaaneq inuiaqatigiinni inulerinermi sunniuteqarsinnaanissaa sunniuteqassasoq ilimagisariaqarpoq. Qanoq akissarsiatigut qaffaaneq angitigissanersoq maanngaanniit ersarissumik oqaatigineqarsinnaanngilaq. Ukiakkut Inatsisartut ataatsimiinneranni 2018-imi partiit tamarmiullutik inulerisut akissarsiamikkut qaffaavigineqarnissaat isumaqatigissutigaa.

Saqqummiunneqartut ataatsimiititaliamit tusaatissatut tiguneqarput, oqaatiginngitsoorumanaguli, Namminersorlutik Oqartussanit, kommuninit imaluunniit namminersortunit ingerlanneqarlutik ulloq unnuarlu angerlarsimaffiuneri apeqqutaatinnagu, sulisut pineqartut pillugit unammingaatsiartoqartarmat. Tamatuma malitsigisaanik aningaasarsiat atukkallu ulloq unnuarlu paaqqinniffinni assigiinngissuseqarnerisa sulisoqarniarnermut sunniuteqarsinnaanera, taamaalilluni taakkunani sulisunik piginnaasalinnik amigaateqartoqalersarnera avaqquunneqarsinaanani.

6. Ataatsimiititaliap inassuteqaatai

Ataatsimiititaliami amerlanerussuteqartut Siumumeersut Demokraatineersullu siunnersuut pillugu ima oqaaseqarput:

Inuiaqatigiinni ammasuuneq ersarissuunissarlu pingaaruteqartorujussuusoq amerlanerussuteqartut isumaqarput. Tamanna aamma ulloq unnuarlu angerlarsimaffinnut namminersortunut atuuppoq. Nalunaarummi matumani ulloq unnuarlu angerlarsimaffiit namminersortut aningaasaatitik qanoq atortarneraat pillugu ammasuunissaq qulakkeerniarneqarpoq. Amerlanerussuteqartunut pingaaruteqarpoq tamatuma qulakkeerneqarnissaa.

Siunnersuummi paragrafit taaneqartut siunnersuutigineqartutut allanngortinneqassappata angerlarsimaffiit ingerlanneqarneranni atuinerup nakkutilliinissamut periarfissat annikillinerannik kinguneqassaaq. Tamanna akueriuminaassaaq. Aalajangersaasartutut sapinngisamik annertunerpaamik ammasuunissaq ersarissuunissarlu anguniartuartariaqarparput.

Tamanna tunngavigalugu paragrafit taaneqartut kissaatigineqartutut allanngortinneqassappata pisortat aningaasaataannik naapertuutinnngitsumik atuisoqaratarsinnaammat amerlanerussuteqartunit ilanngullugu oqaatigineqartariaqarpoq. Tamatuma peratarsinnaanera minnerpaaffianiituartariaqaripput amerlanerussuteqartut isumaqarput.

Tamanna tunngavigalugu **qulaani taaneqartut ataatsimiititaliami amerlanerussuteqartut siunnersuut itigartinneqassasoq inassutigaaq.**

Ataatsimiititaliami ikinnerussuteqartut Inuit Ataqtigiit siunnersuut pillugu ima oqaaseqarput:

Inuit Ataqtigiit pingaarnertut meeqqat angajoqqaaminnit sumiginnagaasimanerup kingunerisaanik angerlarsimaffiup avataanut inissittariaqalersimasut, kinguaassiutitigut atornerlugaasimasut immikkullu allatigut pisariaqartitsisut ulloq unnuarlu paaqqinnittarfinnut inissittariaqartut inuiaqatigiinni pitsaanerpaamik isumassorneqarnissaat pingaartippaat.

Aamma meeqqanik isumassuinermi inuiaqatigiinni annertoorujussuarmik kivitseqataasut tassalu ulloq unnuarlu paaqqinnittarfiit imminut pigisut pisortanit tatisimaneqaratik ingerlaannarnissaat qularnaartariaqarparput.

Inatsisitigut allaffissornikkullu aporfilersorneqaratik ingerlasinnaanissaat Inuit Ataqtigiit sulissutigiuarusuppaat. Ulloq unnuarlu paaqqinnittarfiit imminut pigisut pisortanit annertuallaamik inatsisitigut aqunniarneqarnerujussuat Inuit Ataqtigiit akuersaanngilaat.

Nalunaarummi Namminersorlutik Oqartussat taamak annertutigisumik ulloq unnuarlu paaqqinnittarfinnut imminut pigisunut qulangersimaarinninniineq

paasisinnaangilluinnarparput. Ulloq unnuarlu paaqqinnittarfiit imminut pigisut pisortanit qulangersimaneqaratik, taamaattorli nakkutiginninnissat nalinginnaasut atorlugit, ingerlatsisinnaanissaminnut pisinnaatitaaffeqartariaqartut isumaqarpugut.

Inatsisit atuuttariaqarput sullitassanut kingunerluutitassaqaanngitsumik. Maanna inatsit atuutilersoq malissagaanni annilaanngatigisinnaavarput, ulloq unnuarlu angerlarsimaffiit ilaasa matusariaqalersinnaaneriniq, taamaattoqassappallu meerarpassuit sumut inissinneqartariaqalissanersut takorlooruminaatsipparput. Ullumikkut utaqqisut aamma amerlammata.


Taamaattumik siunnersuutip siunertaa qitusoq meeqqat ulloq unnuarlu paaqqinnittarfinni angerlarsimaffeqartinneqartut sapinngisaq tamaat pitsaanerpaamik atugassaqartinneqassasut qitiutillugu nalunaarutip allanngortinneqarnissaa Inuit Ataqtigiit tapersorsorpaat.

Meeqqat isumassortariaqavissortut immikkullu pisariaqartitsisut matumani pineqarput.


Siunissami qaqugukkulluunniit ulloq unnuarlu paaqqinnittarfiit atorfissaqartinneqartuartaussaapput. Ulloq unnuarlu paaqqinnittarfiit imminut pigisut ukiorpassuarni pisortanit isumalluuteqaratik illutatigut, sulisutigut, meeqqanullu isumassortariaqavissortunut sullissinissaminnut naleqqussarluarsimasut inuiaqatigiinni annertuumik kivitseqataanerisa innarlerneqannginnissaa Inuit Ataqtigiit pingaartippaat.

Tamanna tunngavigalugu **qulaani taaneqartut ataatsimiititaliami ikinnerussuteqartut siunnersuut akuerineqassasoq inassutigaaat.**


Taama oqaaseqarluni isumaliutissiisumilu allassimasunut paasinnilluni ataatsimiititaliap siunnersuut aappassaaniigassanngortippaa.



Stine Egede
Siulittaasup tullia



Laura Táunâjik
Siulittaasoq



Karl-Kristian Kruse

16. maj 2019




Nivi Olsen




Mikivsuk Thomassen

UPA2019/42



Malene Vahl Rasmussen



Aqqa Samuelsen